

---

12.11.1976 - 11.90

## Sin fossa da Barla Catrina Gamboni-Valier, Sedrun

(Corr.) Numnasontga! La sontga messa festiva d'avonmiezdi ei vargada. Entuorn las duas clozman ils medems zenns cun tuns lamentonts in stendiu til da bara al santeri da sogn Vigeli a Sedrun. Il cor d'ina buna mumma e dunna ha calau da batter. Barla Catrina Gamboni-Valier vegn pertada alla fossa. Il santeri s'empleina suenter il survetsch divin en baselgia fullanada. Bein enzatgei commuentont da saver vegnir satraus il di, nua che ins seregorda dallas caras olmas che ein idas ordavon a nus.

Barla Catrina Gamboni-Valier ei naschida a Camischolas ils 5 da matg 1906 sco emprema feglia da Vigeli e Marta Valier-Bear. Quella famiglia ha giu 6 feglias e 4 fegl. Duas feglias ein mortas sco barets. Gia baul ha ei tuccau a Barla Catrina da luvrar e segidar en casa e sil funs. Siu bab fuva in pur da vaglia. La defuncta ei adina stada in buna vischina che tut carezava. Semper da bien humor, segidava ella adina leu, nua che ei fageva basegns. — Igl onn 1934 sespresa ella cun Giachen Giusep Gamboni e serenda a Sedrun. La buna educaziun, gudida en casa paterna, ha ella plantau vinavon en sia atgna famiglia da 4 fegl e 3 feglias. Lavor ed oraziun eran sia devisa. Il bien mariu ei ius ordavon ad ella 1971. Per ella ed ils ses ina greva frida.

Nunspetgadamein splunta vonzei in'autra greva crusch. Disada da luvrar, ha ina malsogna maligna e nuncurabla sfurzau la cara defuncta da serender el spital. Bein ha quella dimora purtau ad ella in cert levgiament. Mo deplorablamein serepetan sias dolurs danovamein. Negina medischina po pli gidar. Seremessa en la veglia dil Segner, renda Barla Catrina sia olma al Scaffider



ils 29 da november 1976 en la vegliadetgna da 70 onns e miez. Nus, che havein enconuschiu la cara defuncta, havein savens admirau cun tgei pazienzia e resignaziun ch'ella ha purtau sia greva e dolorusa malsogna. Ussa ha ella astgau retscheiver la pagaglia, che mo il Segner sa dar. Ils davos onns da sia veta ha siu fegl Rest giu special quita per sia cara mumma. Allas familias en malencurada admettein nus nossa sincera condolentscha. Alla cara defuncta giavischein nus la gloria dil sogn parvis. G